

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 66 (1952)

**Nachruf:** Professer dr. Jakob Jud : 12.1.1882-19.6.1952

**Autor:** Schorta, A.

#### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 22.08.2025

**ETH-Bibliothek Zürich, E-Periodica, <https://www.e-periodica.ch>**

---

# Professer dr. Jakob Jud

12. 1. 1882—19. 6. 1952

Als 18 mai 1951 ha la radunanza da vaschins da Scuol nommà unanimamaing a dr. Jakob Jud, professer da romanistica a l'università da Turi sco vaschin d'onur. Daspö blers ans solaiv' el passantar ün maïset da vacanzas illa chapitala d'Engiadina bassa ingio ch'el pigliaiva albierg cun sia pisserusa consorta a l'Hotel Filli. Scuol l'eira dvantà per uschedir üna seguonda patria. Qua as recreaiv' el da las staintas dal semester-e da sia lavur scientifica. Qua paraiv' el da sentir in cumün e cuttüra la vusch dal geni rumantsch ladin vivaint in ün pövel schlass e conscient da sa forza e da sa valur. In vivais-chas discussiuns e paschaivlas baderladas culs manaders spiertals dal cumün, ma eir cun simpels massers e dunnans s'avaiv' el acquistà profuondas cugnuschentschas da l'istoria e da la vita dal pövel.

Tschert cha quaista fideltà a Scuol, demussada tras ans ed ans gniva remarchada cun plaschair da chi chi cugnuschaiva a Jakob Jud. Ma quetant nun avess mâ brich bastü per al far vaschin d'onur, nu füss stat avuonda per stimular als da Scuol da's render ils 24 avuost avant l'hotel per dir a lur nouv convaschin tras lur parsura dr. Men Gaudenz e cun ün pêr chanzuns quant fich ch'els il stiman.

La famiglia Jud, da veglia derivanza paurila ais ragischada fermamaing in diversas parts da la Svizzera, a Basilea per ex. fingià daspö il traideschavel tschientiner. Il plü derasada ais ella hoz i'ls chantuns Turi, San Galla e Grischun. Ils Juds grischuns paran dad esser Gualsers: Fingià dal 1375 cumpara la schlatta a Runggalier, illa colonietta vadüscha sül munt tanter Tschiertschen e Churwalden. Gualsers sun eir ils Juds da Langwies e da Tain.

Professer dr. Jakob Jud, nat ils 12 schner 1882 a Wengi, Turgovia, derivaiva da Zumikon, chantun Turi. Seis genituors, Jakob

Jud e Wilhelmine Hess chi possedaivan üna modesta butietta fettan grands sforzs per al laschar frequentar davo la scoula primara eir il gimnasi a Winterthur. Il stüdi universitari (1900—1906) percuter as stuves il giuven ourdvart talentà ed intraprendent guadagnar in buna part svess. Uschè as declera eir il fat cha l'inviern 1902/1903 il student immatriculà a l'università da Turi aintra sco magister privat illa chasa d'pravenda da San Murezzan, impè da passantar — sco ch'el bramaiva — ün semester a Vienna pro'l grand maister da romanistica Wilhelm Meyer-Lübke o a Berlin pro'l renomnà Adolf Tobler. Per buna sort quaista renunzcha a la quala el pensaiva cun üna tschert' increschantüna fin a seis vegls dis, nun ha nimia impedi la fuormaziun scientifica dal giuven student. Blerant ais ella stattla la radschun, chi'l laschet chattar uschè adura la clav dal grand s-chazi retorumantsch ch'el ha lura rasà oura d'ün cuntin davant ils ögls dals scienziats e dal pövel svizzer. Lasü in terra putera chi quella vouta eira linguist-camaing amo bler plü closa co uossa, il giuven sorti per la prüma jada da seis ambiaint alemannic resainta cun intensità straminabla l'originalità da nossa favella. Immez il travasch d'ün lö da cura mundial dedichescha el sias uras libras a la lectura dad ouvras ladinas, ad exercizis pratics da conversaziun ed a la collecziun da plebs ed interas frasas da la bocca vivainta dal pövel. Per seis ami Christoph Luchsinger chi prepara üna dissertaziun davart la terminologia dals urdegs e da la vaschella l'alp cumpilescha el ün inter questiunari ch'el surdà lura persunalmaing al giuven student puter Florian Melcher da S-chanf ed al ravarenda N. Juvalta da Bravuogn. El svess nota aint in ün oter questiunari fuormas dialektalas per Fuldera e Zuoz e, turnand da San Murezzan, eir per lös giò d'via sco Calantgil ed a Flerda, ingio cha la veglia favella rumantscha ais ouramai stütza. Casü a San Murezzan scriva el per la «*Neue Zürcher Zeitung*» (1903, nr. 173) l'artichel chi sta a la testa da la bibliografia da sias publicaziuns: «*Was bedeutet der Name Engadin?*» Casü, davo paschiunantas uras da lectura in nos texts dal saideschavel tschientiner madüra in el eir il propöst da s-chaffir üna nouv' ediziun dal plü vegl drama ladin, conservà in ün manuscrit contemporan, nomnadamaing da «*Las desch eteds, da Gebhard Stuppaun*», giovà ad Ardez l'an 1564 il di da Pasqua: Jakob Jud finischa da copchar il manuscrit l'avuost 1903 ed il

publichescha dal 1905 aint illas Annalas, vol. 19, muni d'ün glos-sari ourdvart cumplet e da granda valur.

Per ün spiert uschè vast sco quel da Jakob Jud la Retoromania, schabain cha quella jada eir'la in blers reguards amo «terra inco-gnita», nu pudaiva esser il champ, sül qual el s'avess pudü fixar exclusivmaing. Sia mira tendschaiva plü dalöntsche; la patria da seis geni eira l'Europa, sco ch'ella s'ha s-chaffida our da l'imperi roman e da seis inscunter culs pövels germans. Duos ouvras scrittas amo da student: «*Die Zehnerzahlen in den romanischen Sprachen*» (1905)<sup>1</sup> e la dissertaziun «*Recherches sur la genèse et la diffusion des accusatifs en -ain et en -on*» (publichada 1907) and sun perdütta.

Impuls decisivs avaiva il giuven romanist retschavü impustüt dal grand Jules Gilliéron, professer da romanistica a la Sorbonne a Paris ed autur dal gigantesc «*Atlas linguistique de la France*». Ma dalöntsche dal privel da dvantar ün simpel epigon dal maister ch'el insembel cun Karl Jaberg ed J. U. Hubschmied udit dürant l'inviern 1904/1905, Jakob Jud nun ha arcugnuschü la geografia linguistica per la suletta via per arrivar a nouvas conclusiuns. El ha blerant tscherchà cun success il perfecziunamaint da las metodas scientificas in üna bain manaschada quadria da la geografia lin-guistica cun la lexicologia istorica, culla perscrutaziun da las chosas (Sachforschung) e cul folclore (Volkskunde). Tuot seguond il caracter dal problem stübgìa savaiv' el da dar la preponderanza ad üna o tschella o l'otra da las metodas, adüna be penetrà da la voluntà irresistibla da rivar ad üna soluziun perdüraivla da la lezcha ch'el svess s'avaiva dat. Schi, illa tschercha da nouvas meto-das vezzaiv' el ün dal plü nöbeln böts dal sciensià. Ils pleuds da Hugo Schuchardt: «*Mehr als die schwierigste Rechnung, die mit Hilfe alter Operationen ausgeführt wird, bedeutet die Ermittlung einer neuen Operationsart; in der Vervollkommenung der Methoden liegt der wahre Fortschritt der Wissenschaft*», cha Jakob Jud ha tut per motto da seis tractat d'abilitaziun, sun per uschedir restats seis credo scientific fin a seis ultims dis. In quaist tractat dedichà a

---

<sup>1</sup> Nus reproduin qua ils tituls sainz' indichar il periodic aint il qual las singulas laviors sun cumparsas. Il lectur chatta tuot las indicaziuns necessarias aint illa «Bibliographie der Veröffentlichungen von J. Jud, „Sache, Ort und Wort“, Festschrift Jakob Jud, Romanica Helvetica, Bd. 20, Zürich 1942».

l'istorgia dal pled frances *poutre 'trav'* cumüna el cun success la geografia linguistica cun la perscrutaziun da las funtas medievalas per sclerir che forzas e tendenzas chi han chaschunà il svilup dal pled latin popular '*pulliter*' = 'puleder' ad ün sen tecnic sco 'trav'. Sortind da quaista lavur giuvenila perfecziunescha J. Jud sia metoda da perscrutaziun in üna lingiada d'otras laviors da las qualas «*Probleme der altromanischen Wortgeographie*» (1913) vain nomnada cun radschun ün cheu d'ouvrä da prüma classa.

La mera part da quaists stüdis as baseschan sün la funtana quasi inexauribla cha Jules Gilliéron ha fat sbuorflar cun seis «*Atlas linguistique de la France*». Co stuvaiva Jud resentir, cha per tuot il rest da la Romania da tals atlas nun as vezzaiva amo ne fastizi ne mez. Ma madinà ch'el s'avess laschà stramantar. Ingio cha la s-charsdà da material paraiva da vulair padimar il cuors da seis stüdis, as mettet el svess a cleger insembel ils pleds e las fuormas chi avaivan da'l permetter da penetrar plü chafuol aint ill' istorgia da la Romania. Ed in quaista stantusa lavur da collezioni as algordaiva'l adüna darcho da seis prüms pass sco exploratur in terra grischuna, adüna eir' el penetrà da la persvaziun, cha güst in nossas vals muntagnardas as stopcha avair conservà ün grand numer da pleds chi tendschaivan chafuol aint il temp roman e preroman. Dals s-chazis ramassats ans preschanteet el il 1911 üna prüma custaivla prova: «*Dalla storia delle parole lombardo-ladine*», üna lavur programmatica da var 40 paginas chi tschercha da gruppar il s-chazi da pleds preromans mantgnüts in noss dialects alpins al nord ed al süd da las Alps. Amo mancan las grandas cartotecas dal Dicziunari rumantsch grischun e dal «*Vocabolario della Svizzera italiana*» ed eir il material collectà pür a partir dal 1919 da Paul Scheuermeier, il maister dals exploratuors linguistics pel «*Sprach- und Sachatlas Italiens und der Südschweiz*». Perque nu po quaist stüdi neir penetrar in tuot las chafuollezzas ed in tuot las ingiavineras. Tuottüna ha el mantgnü si' importanza. Sainza quel nun ans pudessans imaginar ne las laviors plü madüras dal maister: «*Mots d'origine gauloise*» (1920 e ss.) e «*Zur Geschichte der romanischen Reliktwörter in den Alpenmundarten der deutschen Schweiz*» (1945) e nemain la dissertaziun da seis scolar Renato Stampa, il «*Contributo al lessico preromanzo dei dialetti lombardo alpini e romanci*» (1937).

Sco cha per dar principi al stüdi dal substrat preroman Jakob Jud ha bramà da tscherchar sün noss munts il lö chi al permettaiva da vair intuorn ed intuorn aint il zoppà da l'istorgia linguistica, uschè ha'l tschernü il Grischun eir per puonch da partenza d'üna otra gruppera da laviors: l'istorgia dal vegl vocabulari ecclesiastic. Ils 14 schner 1919 salvet el aint il rauogl da la Società istoric-antiquara a Cuoir a ün referat annunzchà suot il titul: «*Was lehrt uns die bündnerrom. Kirchensprache über die Geschichte des ältesten Christentums in Rätien?*» Il referat publichà aint il annuari da la Società istorica dal medem an avet ün effet sensaziunal. Sainza as referir directamaing a discussiuns intuorn l'autonomia dal linguach rumantsch, musset il professer zürigais güst per mans da la veglia terminologia ecclesiastica quant fich cha nossa favella alpina as zavra dal lombard ed italian al süd da las Alps e quant chafuol aint ill' istorgia cha quaistas differenzas sun ragischadas.

Ma las glistas da pleds comunichadas fingià al principi dal referat, cumanzand cun

<i>Kirche</i>	surselv.	baselgia	tessinais	gesa
<i>Kirchgemeinde</i>		pleiv		parokia
<i>Glocke</i>		zen		campana
<i>Glockenturm</i>		clutger		campanin
<i>Friedhof</i>		senteri		sagrà
<i>Küster</i>		caluster		segrista

e cuntinuand cun dunzainas dad oters terms revelet eir ad ün trat, cha'l stüdi da la terminologia ecclesiastica ais ün mez dals plü custaivels per penetrar aint ill' istorgia da la cristianisazion na be da la Rezia, ma da l'Europa intera. I nu surprenda perque cha'l genial cugnuoschidur da las linguas neolatinas chi disponiva sco pacs eir dad enormas cugnuschentschas da l'istorgia culturala da l'Europa, scriva il 1934 üna nouva lavur: «*Sur l'histoire de la terminologie ecclesiastique de la France et de l'Italie*».

Las Annalas nu pon as dar l'incumbeanza da caracterisar l'intera producziun scientifica da Jakob Jud, chi be fin l'an 1942 quintaiva inclusive las recensiuns da laviors dad oters erudits 288 numers e surpassa hoz tschert ils 400. Chi chi brama da's render quint pigliarà per mans il tom 20 da la seria Romanica Helvetica cha seis

collegas e scolars al dedichettan in chaschun da seis sesantavel anniversari. Là as chatta süllas prümas paginas üna bibliografia da sias publicaziuns dal 1903 fin al 1942. Per l'últim decenni da sia operusità gnarà publichà ün supplément aint illa revista Vox Romanica.

Üna grand' ouvra, ouvra monumentala chi cumpiglia eir la Retoromania e restarà per adüna üna funtana inexauribla sto però amo gnir preschantada eir al lectur rumantsch:

*L'Atlas linguistique ethnografic da l'Italia  
e da la Svizzra meridiunala<sup>1</sup>*

Las impreschiuns cha'ls duos students, il zürigais Jakob Jud e'l bernais Karl Jaberg pigliettan cun sai our dal semester passantà a Paris l'inviern 1904/1905 sco scolars dal grand Jules Gilliéron sun stattas decisivas per tuots duos e que pels dis da lur vita. Ils prüms faschiculs da l'«Atlas linguistique de la France» cha l'autur decleraiva a seis students in möd original ed entusiasmant han laschè madürar bainbod pro'ls duos giuvens svizzers il plan dad agiundscher a l'atlas linguistic frances ün' ouvra per ün' otra part da la Romania, nomnadamaing per l'Italia e las parts lombardas e ladinas da la Svizzra. Jakob Jud s'avaiva acquistà fingià dal 1902/1903 amplas cugnuschentschas dals dialects ladins; plü tard collectet el per mans d'ün agen questiunari in bainquants cumüns dal Tessin e da l'Italia. Seis ami e collega Jaberg as dedichel plü intensivamaing als dialects francoprovenzals, s'acquistand uschè schlassa fundamainta pustüt per güdichar ils fats linguistics da las parts occidentalas dal Piemont. Ma bain uschè granda garanzia per buna reuschida sco tuottas cugnuschentschas realas eiran l'energia e l'idealissem dals duos giuvens svizzers, chi s'univan in strett' amicizia per ün' ouvra cumüna. Perche il plan eira gigantic, e colossala ais eir l'ouvra accumplida.

Ün atlas linguistic ais ün' ouvra chi nu preschainta il material linguistic, saja que lura pleds, o fuormas o frasas in ün uorden alfabetic sco ün vocabulari o in ün uorden istoric grammatical sco üna monografia linguistica, dimpersè in ün uorden geografic unind

---

<sup>1</sup> «Sprach- und Sachatlas Italiens und der Südschweiz» (1928—1940).

sün üna carta dal territori stübgia ils pleds per üna datta chosa o idea o acziun. Ün' ögliada sün üna tala carta basta per ans muossar las differenzas linguisticas-dialectalas tanter singuls pajais, schi perfin singulas vals e singuls cumüns. Ün atlas linguistic nu cum-piglia però be üna e neir be ün pêr dunzainas da talas cartas, dim-persè el prova da preschantar in seis möd ün s-chazi da pleds e da fuormas plü grand pussibel. Ma plü vast e varià cha'l pajais stübgia ais e plü difficil cha que dvainta da far la dretta tscherna dals pleds chi s'affan per la preschantaziun sün üna carta. Uschè füss que melnüz da vulair far üna carta linguistica da l'intera Italia pels noms populars dal zuonder, perche quaitis ais cuntschaint be in regiuns da muntagna. Güst uschè inütil füss que da vulair resguardar in ün atlas da tal gener chosas cuntschaintas be als signuns da nossas alps o be als pes-chaders a la riva dal mar o be als butiers da las citads talianas. Dalander resulta che lavur preparatoria cha'ls autoors d'ün atlas linguistic ston prestar be per cumpilar ün questiunari chi permetta da racoglier material adattà per la preschantaziun geografica. L'an 1912 quaitis questiunari provà oura sün bleras excursiuns linguisticas per l'Italia intuorn eira tant inavant madürà. Immez ils preparativs per la finanziaziun da l'ouvra progettada in 8 volüms prorumpet la prüma guerra mundiala. Uschè pudet dr. Paul Scheuermeier, scolar da Jakob Jud, cha'ls iniziants avaian acquistà sco exploratur, cumanzar pür l'an 1919 cun seis viadis: il prüm tras terra rumantscha, lura lombarda. Ad el s'unittan plü tard duos otres exploratuors per l'Italia meridiunala, la Sicilia e la Sardegna. L'an 1927 la collecziun in 405 cumüns e citads da Ramosch fin giò vir e giosom la Sicilia eira finida, il material entrà davoman in duos copchas aint illas stüvas da Jaberg e Jud sorti e classifichà. Fingià l'an 1928 cumparit il prüm volüm cun 198 cartas. L'an 1940 l'ouvra dad 8 volüms e 1705 cartas da  $58 \times 45$  cm eira accumplida. Da la penna da dr. Paul Scheuermeier cumparit 1943 il prüm volüm da l'ouvra «*Bauernwerk in Italien, der italienischen und rätoromanischen Schweiz*», ouvra richamaing illustrada chi fuorma üna part integrala da l'Atlas linguistic. Ün seguond volüm ais in preparaziun.

Ingün nun as fa ün' idea dals sforzs e da las staintas cha'ls duos iniziants e lur exploratuors, schi lur famiglias han fat dûrant amplamaing duos decennis per manar a buna fin l'ouvra. La lec-

tura dal volüm «*Der Sprachatlas als Forschungsinstrument*» (1928) chi introdüa il lectur ill' istorgia e structura da l'atlas, meglina vant da las prefaziuns als singuls toms, perdüttas da quell' ardur e paschiun chi caracteriseschan mincha grand scienzià, ans fan bainschi stupir e'ns implan da recugnuschentscha. Ma be chi chi ha gönü chaschun dad entrar tanter ils ans 1930 e 1940 bain suvent illa chasa Jud a Zollikon e vair co cha là l'intera famiglia sacrificava suvent perfin la dumengia davomezdi cumpiland ils manuscrits da las cartas e corregind ils transparents da quellas, be chi chi sa cha'l medem travasch regnaiva eir a Berna in chasa Jaberg, po incleger che pais cha'l pled «Atlas-Sorgen», pronunzchà dal rest raramaing, avaiva in quels ans pels duos professers in plain uffizi.

Il progress metodic cha la geografia linguistica fa cul pass da l'«Atlas linguistic da la Frantscha» a l'«Atlas linguistic-etnografic da l'Italia e da la Svizzra meridiunala» ais d'attribuir in prüma lingia a l'orientaziun invers las chosas. Pled e choa vegnan stübggiats a medem temp. Las cartas nu noteschan be ils differents noms da l'arader, ma ans dischan eir cun legendas e skizzas co cha l'*arader* ais fat, in Grischun tant co giò las planüras lombardas o las costeras sicilianas. Ellas nun as cuntaintan da notar las differentas fuormas dal pled *jotsch*, ital. *falce*, ma muossan cun blers disegns co ch'üna fotsch grischuna e seis *schilun* sun fats, co ch'els vegnan colliats e. u. i. Congualand ils urdegs d'üna cuntrada cun quels d'ün' otra, il perscrutader versà po trar conclusiuns chi nu servan be a sclerir l'istorgia dal pled, ma eir da la choa, ad eruir ils lös dals quals tscherts urdegs sun gnits derasats sco mar-chanzia. Uschè l'atlas linguistic etnografic dvainta in ot grà eir ün instrumaint da prüm uorden per la perscrutazion da l'istorgia culturala. Jakob Jud and avess svess dat daplü cumprovas, co que cha sia bibliografia registrescha, sch'el in lavur cumüna cun seis collega Jaberg nun as avess senti in dovair da curunar seis atlas cun ün index e glossar destinà ad avrir ils chotens ils plü zoppats da l'ou-vra. Uschè millieras dad uras gnittan dedichadas a quaist register chi staiva per gnir a fin al mumaint cha'l lavuraint instancabel stuvet as surdar a la mort.

Amo oters dovairs l'impedittan da racoglier svess la mess ch'el vezzaiva a prüir sül champ preparà da seis atlas.

L'an 1936 preschattettan Jakob Jud e seis collega Arnald Steiger a la scienza il prüm faschicul da lur revista

*Vox Romanica  
annales helvetici explorandis linguis romanicas destinati.*

Quaista revista destinada in prüma lingia pels sciensiats svizzers, ma chi ha da prüm d'innan avert sas archas eir als collegas esters chi tgnaivan in onur seis ideals, eira l'accumplimaint d'ün vegl fervent giavüsch. Tuottüna avet sa cumparsa al mumaint cha intuorn ed intuorn la Svizzra ideas politicas, mitos da sang e razza, cumanzaivan a metter in sclavaria la scienza, l'effet d'ün' ouvra cieada our dals bsögns dal preschaint. Seis spiert svizzer fin aint il mizguogl, seis tun objectiv, gualiv e nöbel, seis niveau scientific adversari da tuottas vödarias han asgürà a la Vox Romanica in pacs ans la stima dals romanists da tuot il muond. Ils dudesch volüms cumpars fin inguan restan ün monumaint dürabel in onur da la scienza svizzra. Sco redactur da la Vox Romanica nu bra-maiva J. Jud be da publichar laviuors da paisa davart ils plü vasts, sco dals plü minuzius problems linguistics, ma güsta tant eir dad orientar ils lectuors davart la valur da las ouvras chi cumparan davoman, davart l'andamaint da tschertas laviuors in preparaziun, e davart la vita ed operusità da seis collegas. El nun as lascha stramantar da leger svess e recensar an per an dunzainas da cudeschs e tractats scientifics. Uschè ils dudesch volüms da la VR rinserran passa 150 recensiuns firmadas modestamaing cun las inizialas J. J. e 10 necrologs. Muni da cugnuschentschas cha seis collega Leo Spitzer<sup>1</sup> nomna cun tuotta radschun «ein ungeheures Wissen» as daiva Jud paina da nu referir be che cha'l's cudeschs recensats cuntegnan, ma dad examinar cun ögl critic l'inter cuntegn e contribuir svess — schi faiva dabsögn — nouvs exaimpels, nouvas ponderaziuns e nouvs puonchs da vista per sustgnair üna teoria güsta, ma memma pac motivada, o lura impuonder seis enorm material e sia intera eloquenza per respinger ideas fallambras e sbagliadas. Quaistas recensiuns illa Vox romanica sco quellas cumparsas plü bod in otras revistas sun perque üna richa funtana da

---

<sup>1</sup> Leo Spitzer, «Meisterwerke der Romanischen Sprachwissenschaft», München 1929, p. 370.

nouvas ideas, nouvas cugnuschentschas ch'ingün chi voul güdichar il stadi odiern da la linguistica nu das-cha invlidar. Cun grand guadagn as legia meglinavant seis necrologs dedichats a collegas culs quals el staiva in contact uman o scientific plü stret. Per dissertaziuns ed otras laviors plü vastas fundettan J. Jud ed A. Steiger a medem temp cun la Vox romanica la seria «*Romanica Helvetica*» chi ais arrivada hoz a seis 40avel volüm. Alimentada in granda part da dissertaziuns our da la scoula romanistica zürigaisa, cha J. Jud avaiva svess let e guidà cun seis cussagls e seis agüd, dà eir quaist' imposanta seria eloquenta perdütta da la personalità dal professer zürigais.

Ils strets liams chi'l colliaivan daspö 1902 cun nossa terra rumantscha l'han uni strettamaing eir cun nos dicziunari naziunal; il

### *Dicziunari rumantsch grischun.*

Aviand prof. Chasper Pult surtut l'an 1913 la redacziun dal DRG. sco successur da dr. Florian Melcher, gnit J. Jud invidà in mai 1914 dad entrar sco nouv commember aint illa *cumischiun filologica*. El acceptet la tscherna e restet fidel al DRG. fin a sia mort. Dal 1915 fin 1931 füt el actuar e sco tal respunsabel pels protocols ch'el scrivaiva cun grand' exactezza e speditività. Crodand l'an 1931 dr. Robert de Planta, il meritaivel fundatur dal DRG., in greiva malatia, surpigliet prof. Jud sia successiun sco parsura da la cumischiun filologica. Il pisser central dal redactur e da la cumischiun eira quella jada, da cumanzar plü spert pussibel culla stampa. Divers motivs obliaivan da nu tardivar plü: l'impazienza dal pövel rumantsch chi vezza in nos dicziunari ün mez da regeneraziun da sa favella, meglinavant la circunstanza cha'l redactur, prof. dr. Chasper Pult, profuond cugnuoschidur da la cultura e lingua rumantscha, avaiva surpassà il glim dals sesanta. Scha'l DRG. vulaiva amo profitar da sias cugnuschentschas per üna seria da faschiculs, schi eiri ura da dar in stampa l'ouvra, eir scha da l'otra vart mals impedimaints sco la depressiun economica cun sias consequenzas finanzialas, las mendas dal material ed oter plü cussgliaivan plüchöntsch da nu far prescha. Jakob Jud ha superà in pacs ans tuot las difficultats. Pel stüdi da dumandas tipograficas invidet el, d'accord cun la suprastanza da la Società retoru-

mantscha, a prof. dr. F. Fankhauser, Winterthur, il meglder specialist in talas dumandas, da far part a la cumischiun. El svessa instruet nouvas collecziuns da material sül lö ed our da la litteratura ed assistit a medem temp al redactur in tuottas dumandas scientificas da maniera cha l'an 1938 il prüm toc manuscrit get in stampa. Il prüm faschicul cumparit la prümagira dal 1939. Il president da la cumischiun filologica chi fingià dal 1924 avaiva trat l'attenziun da vasts circuls a noss' ouvra naziunala cun seis referat «*Aus dem rätsischen Idiotikon*» as volva cun sia suverana introducziun al prüm volüm ad ün circul da lectuors spars in tuot il muond e dvainta quatas ün dals plü eloquents e plü cumpetents propagatuors dal DRG. vers l'exteriur. La profuonda simpatia ed amur cha Jakob Jud resentiva per noss' ouvra naziunala, resplenda il plü fich our da seis oter referat «*Zur Geschichte und den Aufgaben des Vocabolario della Svizzera italiana und des Dicziunari rumantsch grischun*», salvà l'an 1947 aint il rauogl da la «Società svizzra per las Scienzas moralas» (*Schweizerische geisteswissenschaftliche Gesellschaft*).<sup>1</sup> Quaista simpatia ed ardur per l'ouvra ais stattla dominanta persvadenta eir cur ch'el defendava il DRG., be s-charsamaing dotà cun subvenziuns federalas e chantunalas, avant las autoritats, saja a Berna o a Cuoira. Seis ultim viadi pel DRG. pacs dis avant sia mort il manet a Berna, ingio ch'el defendet cun ün votum excellent ils interess dals quatter dicziunaris naziunals da la Svizzra avant il cho dal Departamaint federal da l'Intern, sar cussglier federal Philipp Etter.

A pêr ed a pass cun quaista lavur da propaganda e defaisa gaiava daspö l'an 1939 la quaida lavur vi dals singuls faschiculs e lur artichels. Da las passa 3000 paginas manuscrit cha'l redactuors han prodüt fin l'an 1952, professer Jud ha let üna per üna ant chi gaijan in stampa. Ma eir da las correcturas da stampa nun ha el mancantà da leger gnanc' üna. Be ils redactuors san che somma da remarchas e propostas da caracter redaciunal, da rinviamaints a funtanas linguisticas, folcloristicas ed istoricas ch'el ha contribui. Els e be els pon stimar l'extensiun e la valur da las ponderaziuns etimologicas cha'l scienzià zürigais ha regalà a las prümas 1000 paginas stampadas dal DRG. Las glistas dals pleds stügiats dad el cuntgnüdas aint il DRG. 1, p. 651 e DRG. 2, tanter

---

<sup>1</sup> Publichà aint illa «*Schweizerische Hochschulzeitung*» 1947.

p. 336 e 337 and dan be üna flaivla idea. Jakob Jud eira dvantà plüvieplü, almain que chi reguarda las etimologias, ün veritabel conredactur da l'ouvra.

Cur cha l'an 1904 dr. Robert de Planta avaiva cedü seis inter material per ün Dicziunari rumantsch grischun a la Società retoromantscha ed uschè miss la fundamainta da l'ouvra, s'avav' el reservà be üna chose: la collecziun e la perscrutaziun dal noms locals e noms da personas grischunas, ch'el vulaiva publichar in ün agen volüm, il

### *Cudesch da Noms retic.*

La collecziun dal vast material per quaist' ouvra in tuots 220 cumüns grischuns eira per uschedir finida cur cha'l meritaivel iniziant gnit vers la fin da l'an 1931 greivamaing amalà. Seis assistent, il suotsegnà chi dal 1924 al 1930 avaiva collectà ils noms our da la bocca dal pövel ed our dals archivs cumünals as rechattaiva güst immez il stüdi da romanistica a l'università da Turi. Surpigliand il marz 1932 la responsabilità per la cuntuaziun da l'ouvra s'adösset il student üna chargia chi l'avess stuvü schmerdscher, scha seis magister Jakob Jud nu s'avess pudü resolver da'l gni in agüd examinand davoman las reglas cha quaist statuiva per l'ediziun, l'incuraschand ed as partecipand activamaing vi da la lavur. Pels viadis da controlla e cumplettaziun dvantats necessaris staiva a disposiziun ün modest import stat miss a disposiziun d'üna fundaziun privata. Per la finanziazion da la stampa percuter nu disponiva l'ouvra d'ingüns mezs. Scha'l prüm volüm, ouvra da 583 paginas cun var 70 000 noms locals grischuns pudet l'istess cumparair la prümavaira dal 1939 schi ais que in ot grà il merit da J. Jud chi as partecipet eir vi da la redacziun da las instanzas a la Fundaziun Schnyder von Wartensee ed al chantun Grischun per obtgnair l'import bsögnaivel per pajar la stampa. Amo ans resta da curunar l'ouvra cun l'ediziun dal seguond volüm chi preschainta a la scienza las etimologias dals noms publichats aint il prüm volüm. Las cundiziuns da lavur vi dal Cudesch da Noms sun dvantadas daspö il 1939 blerun plü difficultusas: Davo la mort da prof. Pult, successa l'utuon 1939, ais il suotsegnà gnü nomnà cheureductur dal DRG. il qual el redigia as po dir sulet. Per conseguenza il Cudesch da Noms gnit necessariamaing chatschà d'üna

vart e stuvet daspö as cuntantar per ans a la lunga be da las s-char-sas uras libras. Grazcha a la nouva intervenziun dal president da la cumischiun filologica chi d'accord cun la suprastanza da la Società retorumantscha savet d'interessar diversas nouvas fundaziuns pel Cudesch da Noms, procurand uschè ils mezs per ingaschar forzas auxiliaras, pudet il manuscrit eir da quaist seguond volüm progre-dir da maniera ch'el gnarà a fin dûrant il prossem temp. Id eira stat ün' idea prediletta da l'autur dal Cudesch da Noms da dedichai a quaist' ouvra alchünas eivnas in lavur cumüna cun prof. Jud pei ch'ella pudess amo profitar da las richas cugnuschentschas ch'el possedaiva eir in dumandas da toponomastica. La sort ha vuglù otramaing; ma tuottüna: que cha'l Cudesch da Noms debitescha ad el nu po gnir express cun ün pêr lingias.

### *Il professer e patriot*

L'intenziun da las lingias precedaintas ais statt da depinger la personalità scientifica da prof. Jakob Jud. Plü d'üna jada aise stat motiv d'atschenar eir a sias müravgliusas qualitats d'animatur. Güsta quaista qualità unida cun ün sen da responsabilità ourdvart pronunzchà e cun vastischmas cugnuschentschas da las linguas neolatinas e lur istorgia il predestinettan eir sco professer. Perque ans saja permis da skizzar cuortamaing eir quaista vart da sia personalità. L'an 1905 eira el entrà al gimnasi da Turi sco magister auxiliar per frances e talian, ün an plü tard gnit el tschernü definitivamaing sco magister regular. L'an 1908 as habilitet el a l'università da Turi ingio ch'el savet da s'acquistar fingià sco docent privat ün numer da fidels students. Fin l'an 1922 quaist lavurader incumparabel ha servi fidelmaing sün tuots duos posts. Seis stu-dents impreschiunats da sias qualitats eiran bainschi intervgnits pro'l Departamaint d'Educaziun zürigais ed avaivan obtgnü per el üna reducziun dal numer da las lecziuns al gimnasi. Ma pür dal 1922 pudet el gnir nomnà professer extraordinari a l'università e pür dal 1926 *professor ordinarius ad personam*. L'ordinariat regular surpigliet el pür dal 1931 cur cha seis collega Louis Gauchat, cul qual el collavuret lealmaing dûrant 23 ans sainza la minima disso-nanza, as retret. Al post da professer ordinari renunzchet el l'an 1950 per as pudair dedichar plü fich a l'index da seis atlas, a sias otras laviors privatas e — sco ch'el speraiva — al DRG.

Schabain cha la fuormaziun professiunala dals giuvens students chi voulan dvantar magisters da lingua ad üna scoula media ed amo plü fich da quels chi as preparan per la vocaziun da magister secundar pretenda dal professer ch'el preschainta in ün tschert ritmus adüna darcho la medemma materia, Jakob Jud nun as suottamettet mai ad ün schematissem. Seis collegs nun as repetivan! Dal 1908 fin al 1950, dürant 42 ans, ha'l an per an tscherchà da preschantar nouvs aspets da las linguas stübgiadas e nouvs problems. E sch'el stuvaiva davo alch semesters repetir ün colleg per nouvs students, schi mai ch'el s'avess inservi d'ün manuscrit vegl. Adüna darcho s'approfundiv' el da nouv i'ls problems formuland que ch'el vulaiva dir cun l'istessa diligenza sco sch'el ils preschanteess per la prüma jada. Dalander derivaiva lura eir quella fraiss-chezza da l'atmosfera chi regnaiva intuorn el, l'attenziun viva e spontana da seis students, schi l'entusiassem da quels pel stüdi e pel docent. Uschè il numer da seis scolars giaiva creschind d'an in an, e que sainza cha in seis seminari il sentimaint d'üna stretta cumünanza avess pudü patir. El cugnuschaiva a tuots. Da las qualitats, dals duns ed inclinaziuns da minchün as faiv' el bain spert ün' idea e per chi chi gniva pro el per cussagl, avaiv' el adüna temp ed ün bun pled. Chi da seis students nu s'algordess dad ün discuors o tschel coura a Zollikon ingio cha referats e dissertaziuns vis dal student amo be in conturas tuorblas as fuormaivan ad ögl vezzand, da maniera cha eir il plü varsià turnaiva vers chasa cul cheu plain nouvas ideas, cul cour plain curaschi e bun anim. Sainza esser parzial, demuossaiv' el ün' affecziun speciala per seis students grischuns. Invers Stanislaus Deplazes da Surrein, mort il 1916 ill' età da 23 ans, ed invers dr. Martin Lutta, mort il 1918 cun 32 ans, ha quaista affecziun e fideltà dürà lönch sur la fossa via. Que al staiva fich a cour da svagliar in seis students retorumannschs affecziun per lur favella, ün' affecziun ardusa da servir a quella sainza resguard ad interess materials. Uschè ha el importanta art e part vi da la fuormaziun dals homens chi daspö la fundaziun da la Lia rumantscha s'han miss a disposiziun da nos movimaint.

Cha Jakob Jud nun eira cuntschaint be in circuls universitaris dimpersè pro ün' elita plü vasta da nos pövel, stuvinisa attribuir al trat caracteristic da sia persunalità cha'l lectur tschert ingiavina sainza cha and hajan fat manzun: seis patriotissem.

La Svizzra creschüda our da l'istorgia na in consequenza dad alch contrat o dictat da pasch, ma organicamaing per la volontà da quatter pövels avdants intuorn il massiv da las Alps eira per el terra profuondamaing amada. Da sia bocca nun eiran da spettar frasas patrioticas. Da vödas manifestaziuns verbalas as tgnaiv' el dalöntsch. Ma inua cha'ls interess supremo da nossa Svizzra du-mandaivan fats, qua sortiv' el da sia reserva e nun as stramantaiva da portar eir el seis fasch. Uschè ha'l prestà durante la prüma guerra mondiala sco commember da la gruppera da Turi da la Nouva società elvetica tuot quaidamaing üna granda lavur.

Quella jada il conflict tanter la Germania e la Frantscha bütte nan blers tizuns eir in nossa patria svizzra, e tanter la Svizzra francesa e la Svizzra tudais-cha s'avaivan fuormadas privlusas rimas. I faiva nair dabsögn cha'l puonch da vista vairamaing svizzer in quaist conflict gniss üna jada scleri da persuna integra e da format naziunal. Que resentiva eir il Zürigais Jakob Jud, uni stret-tamaing culs liams da sia cultura e tras sia fuormaziun da caracter a la Svizzra latina. Perque ais que plü co be üna casualità cha l'idea da stimular a nos poet svizzer, Karl Spitteler, da laschar udir sia vusch in quaists dis turbulents ais madürada güst in el e cha el l'ha eir suottamissa al poet in ün inscunter a Lucerna. Il discours da Spitteler, «*Unser schweizerischer Standpunkt*», salvà in december 1914 ha gnü fat grand' impreschiun in tuot nossa patria. I nun ais bain brich exagerà dad attribuir ad el ün effet sumgliaint a quel dal renomnà rapport dal general Guisan dal lügl 1940 sul Rütli.

Eir davo la prüma guerra mondiala il privel eira grand cha la Svizzra as laschess orbantar d'ideas estras proclamadas cun grand viers e trumbettöz pustüt dals stadis totalitars. Ma chi gnivan lura da la vart dal favuogn o da la bischa, tanter ils homens chi tgnaivan dretsü la bandera da l'ideal democratic staiva eir Jakob Jud. Persvas cha mincha Svizzer chi s'algorda da las funtanas da nossa libertà e dals fats dals per davants nu possa cupichar, ha'l stimulà seis collegas Ernst Howald ed Ernst Meier dad edir lur ouvra «*Die Römische Schweiz*», üna collecziun da texts ed inscripziuns cun translaziun, vi da la quala eir el collavuret diligaintamaing. El ha merità chà'l cudesch cumpars l'an 1940 ais gnü dedichià ad el. Plü derasada co quaist cudesch ais statta ün' otra ch'el ha promoss sainza vulair resortir: il muossavia patriotic «Wir

wollen frei sein», dal qual ün' ediziun rumantscha gnit procurada da la Società retorumantscha.

Güst l'art e part vi da l'ediziun rumantscha da quaist muossavia ans dà perdütta cha l'affecziun da Jakob Jud pel rumantsch eira in fuond eir ella üna fuorma da seis resentir patriotic. El defendava adüna darcho la tesa, cha'l san equiliber da las naziuns svizzras, la prosperità da las minuritats saran garantits be uschè lönch cha la Svizzra tudais-cha plü pussanta e creschainta co las otras as resolva spontanamaing e voluntariamaing ad üna politica da discreta, ma reala e vigurusa defaisa da quellas. Quaista defaisa invers ils privels da l'intern e da l'extern ha Jakob Jud prestà instancabelmaing, pel Grischun rumantsch e pel Tessin. Cur cha l'an 1917 l'irredentist tessinais Carlo Salvioni, professer a Milan tscherchet da declerar nos rumantsch in seis discuors «Ladinia e Italia» per ün dialect talian e dedüet da quaista conclusiun per tscherts talians il dret da far uorden in chasa grischuna, respondet Jud aint il «Bündnerisches Monatsblatt» cun ün extais artichel suot il titul: «*Ist das Bündnerromanische eine italienische Mundart?*» cul qual el sdarlosset e mettet in muschna pilaster per pilaster da la tesa da Salvioni. A las nouvas attachas dals irredentists da l'era faschista s'opponit el adüna darcho cun nouvs argumaints, uschè l'an 1932 cul artichel: «*Rumontsch' eine lombardische Mundart?*» (Neue Zürcher Zeitung nr. 590), 1938 cun «*Eigenart und Geschichte des Rätoromanischen Graubündens*» (Schweizerische Hochschulzeitung, pag. 350—355), «*Rumontsch*» (NZZ nr. 262).

Dumengia, ils 15 gün 1952 varsquants professuors da l'Università e dal Politecnicum da Turi as vaivan imbarcchats a Vitznau al Lai da las Quatter Forestas per far üna visita al Rütli. Professer Jakob Jud eira eir da la partida. Arrivà sül prà chi sa da svagliar tants sentimaints d'affecziun per nossa patria e pels fats da noss per davants, as tschantet el là ingio ch'ün tschüf da bels fögliers spargia sa sumbriva. E là, circundà da seis amis, toc dandettamaing d'ün culp, rendet el si' orma al Suprem. Seis ultims pleds füttan: «Co cha que ais bel quia!»

Adonta da la suldüna cha seis cumgià ha derasà pro chi chi'l cugnuschaiva, il sen profuond e cuffortant da quaist cumgià nun ais restà zoppà ad ingün.

*Andrea Schorta.*